

**Sulliviit inuussutissarsiuutitut ingerlatat ilaat pillugit inatsisip Kalaallit Nunaannut
atortuulersinneqarneranik peqqussut**

UAGUT MARGRETHE AAPPAAT, Guutip Saammaanneranik Danmarkip Dronningia, imaalior-
pugut:

Inatsimmi nr. 246-mi 27. marts 2006-imeersumi § 8, imm. 2 naapertorlugu¹, aktieselskabet pillugit inatsimmik allanngineq pillugu inatsit, anpartsselskabet pillugit inatsit, sulliviit inuussutissarsiuutitut ingerlatat ilaat pillugit inatsit, Aningaasaateqarfiit inuussutissarsiuutitut ingerlatat pillugit inatsit, det europæiske selskab (SE –inatsit) pillugu inatsit aamma Det Centrale Virksomhedsregister (allaf-
fisornermi nammatanik piuinarsaaneq aamma oqilisaaneq kiisalu suliffeqarfiit mikisut ilaannut il.il. kukkunersiuisussaataanerup annikillisarneqarnerata nassatarisaanik allannguutit) pillugu inatsit, aalajangerneqarpoq inatsit Kalaallit Nunaannut atuutissasoq, taamaalilluni sulliviit inuussutissarsiuutitut ingerlatat ilaat pillugit inatsit Kalaallit Nunaannut ulloq 1. august 2008-miit atuutilissaq imatut oqaasertaqarluni:

Kapitali 1

Atuuffii isumasiuutitaalu

§ 1. Inatsit atuutissaq sullivinnut, sullivimmi peqataasut inuussutissarsiuutitut ingerlatsineq aqutigalugu aningaasarsiornikkut soqutigisaasa siuarsarneqarnissaannik siunertaqartunut.

Imm. 2. Sulliviit inatsimmi matumani pineqaraangata tamanna ima paasineqassaaq tassaasut inuit ataasiakkaat sulliviutaat, interessentskabit, kommanditselskabit, andelsselskabit (andelsforeningit) kiisalu ingerlatseqatigiiffiit peqatigiiffiillu allat killilimmik akisussaaffeqartut, aktieselskabit pillugit inatsimmi kunngip peqqussutaatigut Kalaallit Nunaannut atortuulersinneqarsimasumi, anpartsselskabit pillugit inatsimmi kunngip peqqussutaatigut Kalaallit Nunaannut atortuulersinneqarsimasumi imaluunniit aningaasaateqarfiit inuussutissarsiuutitut ingerlatat pillugit inatsimmi kunngip peqqussutaatigut Kalaallit Nunaannut atortuulersinneqarsimasumi pineqanngitsut. Nunani allamiut sulliviisa assingusut immikkoortortaqarfii inatsimmi matumani aamma pineqarput.

Imm. 3. Sullivik inatsit manna malillugu inuussutissarsiuutitut ingerlatsisutut isigineqassaaq, sullivik

- 1) nioqqutissanik imaluunniit pisinnaatitaaffinnik tigussaangitsunik allanut tunniussisarpat, sullissisarpat assigisaannilluunniit, sulliviup nalinginnaasumik akissarsissutigisartagaanik, imaluunniit

- 2) illuutunik tuniniaasarpat imaluunniit attartortitsisarpat imaluunniit
- 3) aktieselskabit pillugit inatsimmi kunngip peqqussutaatigut Kalaallit Nunaanut atortuulersin-neqarsimasumi § 2, imm. 2-mi, tak. imm. 4 aamma 5, taaneqartutut aktieselskabimut imaluun-niit anpartsselskabimut sullivimmulluunniit allamut, nr. 1-imi imaluunniit 2-mi taaneqartutut inuussutissarsiutitut ingerlatsisumut, attuumassuteqarpat, imaluunniit
- 4) malittarisassat imaluunniit isumaqatigiissut naapertorlugu sullivimmut allamut aalajangiisuu-sutut sunniuteqarpat aamma taassuma ingerlatsinikkut angusaani annertuunik agguagarssiassa-qarpat nr. 3-mi taaneqartutut sullivimmut allamut tassunga attuumassuteqanngikkaluarluni.

§ 2. Interessentskabi inatsimmi matumani pineqaraangat tamanna ima paasineqassaaq tassaasoq sullivik, tassani peqataasut tamarmik namminneerlutik, killiliinertaqanngitsumik aammalu namma-qatigiinnikkut sulliviup pisussaaffiinut akisussaaffiginnittuust.

Imm. 2. Kommanditselskabi inatsimmi matumani pineqaraangat tamanna ima paasineqassaaq tas-saasoq sullivik, tassani peqataasoq ataaseq arlallilluunniit, komplementarit, namminneerlutik, killi-liinertaqanngitsumik aammalu nammaqatigiillutik sulliviup pisussaaffiinut akisussaaffiginnittut, massa peqataasoq ataaseq arlallilluunniit, kommanditistit, killilimmik sulliviup pisussaaffiinut aki-sussaaffiginnittut. Kommanditselskabini 1. juni 1996-ip kingornagut pilersitaasuni tamakkiisumik akisussaaffiginnittutut peqataasut aqutsinikkut aningaasaqarniarnikkullu peqataanissamut pisinnaa-titaassapput.

Imm. 3. Kapitali 1-imi, 2-mi 7-amilu maleruagassat eqqaassanngikkaanni inatsit atuutissanngilaq inuit ataasiakkaat sulliviinut, interessentskabinut aamma kommanditselskabinut. Taamaattorli inter-essentskabit kommanditselskabillu, taakkunani tamani peqataasut tamarmik tassaatillugit aktiesel-skabit, partnerskabit (kommanditaktieselskabit), anpartsselskabit imaluunniit selskabit inatsisitigut taamatulli aaqqissuussivigisat, Erhvervs- og Selskabsstyrelsimi nalunaarsugassatut nalunaa-rutigineqartassapput, sullivinnut taakkununnga §§ 10-17 taamatulli atortuutinneqassammata. Erh-vervs- og Selskabsstyrelsi erseqqinnerusunik malittarisassiorsinnaavoq sulliviit taakku pillugit paasissutissat suut nalunaarsorneqarnissaat pillugu.

§ 3. Sullivik killilimmik akisussaassuseqartoq inatsimmi matumani pineqaraangat tamanna ima paasineqassaaq tassaasoq sullivik, tassani peqataasut arlaannaalluunniit nammineerluni, killiligaan-ngitsumik aammalu nammaqatigiinnikkut akisussaataangitsutut.

§ 4. Andelselskabi (andelsforening) inatsimmi matumani pineqaraangat tamanna ima paasineqas-saaq tassaasoq sullivik § 2, imm. 1-imi imaluunniit 2-mi, imaluunniit § 3-mi pineqartoq, tassani siunertaqarineqarluni peqataasut pisiaqartutut, suliassanik pilersuisutut allatulluunniit assingusukkut peqataanerisigut taakkua tamarmik ataatsimut soqutigisaannik siuarsaanissaq, aammalu sulliviup iluanaarutitigut pissarsiai, aningaasaliissutit nalinginnaasumik erniaat eqqaassanngikkaanni,

peqataasut kaaviiartitsinermit peqataassutaannut naapertuuttumik taakkununga agguanneqartartutik imaluunniit sullivimmi uninngaasuutigineqaannartartutik.

§ 5. Inatsit atuutissanngilaq

- 1) sullivinnut, kommunalbestyrelsit nunaqarfinnillu aqutsit il.il.pillugit Inatsisartut inatsisaanni § 64 naapertorlugu akuerisanut,
- 2) sullivinnut, umiartorneq pillugu inatsimmi umiarsuaatileqatigiit pillugit maleruagassani pineqartunut, aamma
- 3) sullivinnut, Finanstilsynimit imaluunniit EF-ip iluani imaluunniit nunani, Fællesskabimit suleqatigiinnissaq pillugu isumaqatigiissusiorfigisani, tamatumunnga assingusumik nakkutilliisussaataasumit nakkutigisaasunut.

Imm. 2. Erhvervs- og Selskabsstyrelsi aalajangiisinaavoq, sulliviup imaluunniit immikkut ittumik pissusilittut sulliviit tamakkiisumik ilaannakortumilluunniit inatsimmit pineqartunut ilaatitaannginnissaat pillugu. Tamannali aatsaat aalajangiiffigineqassaaq Namminersornerullutik Oqartussat oqaaseqaateqarnissamut periarfissinneqareerata.

Kapitali 2

Sulliviup taaguutaa aamma sinniisitit iliuuseqarsinnaatitaaneq

§ 6. Sulliviup taaguutaa inatsimmi matumani pineqaraangat tamanna ima paasineqassaaq tassaasoq taaguut, sulliviup inuussutissarsiutitit ingerlatsinermini tamatumaluunniit ilaani tunngavigisaa, aammalu sullivik sinnerlugu atsiuinermit atorpeqartussaq.

Imm. 2. Sulliviit taaguutaat ersarissumik imminni immikkooruteqassapput. Sulliviup taaguutaani ilanngunneqassanngillat eqqarleriit aqqi, ingerlatseqatigiiffiup, aningaasaateqarfiup sulliviulluunniit allap aqqi, nunaatit illuutillu aqqi immikkuullarissut, nioqqutissap ilisarnaataa, niuernermit ilisarnaat assigisaallu, sullivimmut attuumassuteqanngitsut, imaluunniit taassumunnga paarlaanneqarsinnaasut.

Imm. 3. Sulliviup taaguutaa taammarsaarutaasinnaassanngilaq. Taaguut sulissutigisanik inuussutissarsiutitit sulianut attuumassuteqanngitsunut innersuussisumik imaqassanngilaq. Inuussutissarsiutitit suliaq aalajangersimasooq atsiunneqarsimappat, taaguut allanngortinneqarnani atuinnarneqassanngilaq inuussutissarsiutitit suliat suussusii annertuumik allannguuteqarata.

Imm. 4. Interessentskabit, kommanditselskabit andelselskabillu (andelsforeningit) aterminni taaguutinik taakkuninga taakkualuunniit naalisarnerinik atuissapput. Allat arlaannaalluunniit taaguutinik taakkuninga imaluunniit taaguutinik taakkununga paarlaanneqarsinnaasunik atuissanngilaq.

Imm. 5. Peqataasut arlaat sullivimmi akisussaassusilittut peqataajunnaarpat, pineqartup aqqa sulliviup aqqani atatiinnarneqarsinnaavoq, pineqartoq taassumaluunniit kingornussisussai tamatumunnga akuersisimassappata.

Imm. 6. Sulliviup killilimmik akisussaassuseqartup taaguutaa killilimmik akisussaassuseqarnera pillugu paasisutissartaqassaaq. Andelsselskabit killilimmik akisussaassuseqartut kisimik naalisaat “A.M.B.A.” atorsinnaavaat.

Imm. 7. Imm. 1-6-imi aalajagersakkat taamatulli atuutissapput sulliviit saniatigut taaguutaannut. Saniatigut taaguummik atuinermi sulliviup taaguutivia ungaluuserlugu ilanngunneqassaaq.

Imm. 8. Nunani allamiut sulliviata immikkoortortaqrifiata taaguumminut oqaaseq “immikkoortortaqrifik” ilanngutissavaa aammalu sulliviup sumiuussusia erseqqissumik nalunaarlugu.

§ 7. Sullivik sinnerlugu iliuuseqarsinnaatitaaneq taamaallaat tunniunneqarsinnaavoq tamakkiisumik akisussaassusilittut peqataasumit imaluunniit peqataasunit imaluunniit aqutsisoqarfimmit, sulliviup malittarisassai malillugit taamaasiornissamut piginnaatitaasumit. Sinniisitut iliuuseqarsinnaatitaasoq piginnaatitaavoq pissutsini tamani, ingerlatsinermut attuumassutilinni, sullivik sinnerlugu iliuuseqartarnissamut, aammalu sullivimmik pisussaaffiliinissamut. Taamaattorli sinniisitut iliuuseqarsinnaatitaasoq erseqqivissumik piginnaatitsissuteqartoqarsimatinnagu sullivip pigisaanik aalaakkaasunik tunisisinnaananiluunniit qularnaveeqqusiussisinnaanngilaq.

Imm. 2. Sullivik sinnerlugu iliuuseqarsinnaatitaaneq inunntu arlalinnut tunniunneqarsinnaavoq, taamaasilluni aatsaat taakkunannga peqatigiinnikkut atorneqarsinnaanngorlugu (arlalinnut ataatsimoortunut sinniisitut iliuuseqarsinnaatitsineq).

Imm. 3. Sullivik sinnerlugu iliuuseqarsinnaatitaaneq killilerneqarsinnaanngilaq inummut allamut sunniuteqartussamik, taamaattoq tak. imm. 2.

Imm. 4. Sullivik sinnerlugu iliuuseqarsinnaatitaasup taamatut piginnaatitaanini allamut tunniussinnaanngilaa.

Imm. 5. Sullivik sinnerlugu iliuuseqarsinnaatitaaneq sukulluunniit arsaarinnissutigineqarsinnaavoq. Piginnaatitsisuusup toqnera sinniisitut iliuuseqarsinnaatitaanerup atorunnaarneranik nassa-taqartussaannngilaq.

Kapitali 3

Nalunaarsuineq aamma eqqartuussisutigoortitsisinnaaneq

§ 8. Sulliviit killilimmik akisussaassuseqartut, tak. § 3, Erhvervs- og Selskabsstyrelsimi nalunaarsugassatut nalunaarutigineqartassapput siulersuisunit, pisortaqarfimmit tamatumunngaluunniit assingusumik aqutsisoqarfimmit.

Imm. 2. Nunani allamiut sulliviisa killilimmik akisussaassuseqartut immikkoortortaqrifiit nalunaarsugassatut nalunaarutigineqartassapput immikkoortortaqrifiup pisortaanit.

§ 9. Sullivik killilimmik akisussaassusilik, Erhvervs- og Selskabsstyrelsimi nalunaarsorneqanngitsoq, taamaattutut pisinnaatitaaffinnik pissarsisinnaananilu pisussaaffilersorsinnaanngilaq. Sullivik aamma eqqartuussisutigut suliasani illuatungiliussinnaanngilaq, pilersitsineq pillugu sulias-siissutaaneq eqqaassanngikkaanni.

Imm. 2. Pisussaaffimmut, nalunaarsorneqarneq sioqqullugu sullivik killilimmik akisussaassusilik sinnerlugu pisussaaffiulersumut akisussaaffiginnissapput pisussaaffiliisuusut imaluunniit tamatumunnga akisussaaqataasut, namminneerlutik, killiliinertaqanngitsumik nammaqatigiiffiunngitsumillu. Nalunaarsorneqarnikkut pisussaaffiit taama ittut sulliviup tigussavai.

Imm. 3. Sulliviup killilimmik akisussaassuseqartup nalunaarsorneqarnera sioqqullugu isumaqatigiissusiortoqarsimappat, isumaqatigiissusioqataasullu ilisimappagu sulliviup nalunaarsorneqannginnera, isumaqatigiissusioqataasup taassuma, allatut isumaqatigiissuteqartoqarsimanngippat, isumaqatigiissut atorunnaarsissinnaavaa, piffissaliusaq § 10, imm. 2-mi aalajangerneqartoq naatinnagu nalunaarsugassatut nalunaarutiginnittoqanngippat imaluunniit nalunaarsorneqarnis-saq itigartitsissutaappat. Isumaqatigiissusioqataasup sulliviup nalunaarsorneqannginnera nalusi-mappagu, taassuma isumaqatigiissut atorunnaarsissinnaavaa sullivik nalunaarsorneqariartinnagu.

Kapitali 4

Nalunaarutiginninneq aamma tamanut saqqummiussineq

§ 10. Erhvervs- og Selskabsstyrelsi sulliviit inatsit manna naapertorlugu nalunaarsukkat pillugit nalunaarsuiffeqassaaq.

Imm. 2. § 8 naapertorlugu nalunaarut Erhvervs- og Selskabsstyrelsimi tiguneqareersimassaaq sulliviup pilersinneqareerneraniit imaluunniit nalunaarutiginnissaanut pisussanngoreernermit kingusinnerpaamik sapaatit akunnerisa aqqanillit qaangiunneranni. Nalunaarut ilanngussivigisaassaaq sulliviup malittarisassaasa naqinnerannik ataatsimik.

Imm. 3. Nalunaarsuutini ilanngunneqassapput siulersuisunut ilaasortat, pisortat tamatumungaluunniit assingusumik aqustsisuusut aqqi najugaallu pillugit paasissutissat, kiisalu kiap sullivik sinnerlugu iliuuseqarsinnaatitaanera. Tamatuma saniatigut ilanngunneqassapput sulliviup aqqa, najugaa, kommuni angerlarsimaffigisaa ukiorlu naatsorsuusiorfia pillugit paasissutissat. Sullivik ukiumoortumik naatsorsuutit pillugit inatsimmi § 3, imm. 1, nr. 4, naapertorlugu ukiumoortumik nalunaarsiamik saqqumiussisassappat aamma kukkunersuisup aqqi nalunaarsuiffimmut ilanngunneqassapput.

Imm. 4. Sullivimmik pilersitsineq pillugu nalunaarut imm. 2-mi piffissaliusaq naatinnagu nassinneqanngippat nalunaarsuisoqarsinnaanngilaq.

Imm. 5. (Kalaallit Nunaannut atortuulersinneqassanngilaq).

Imm. 6. Kommanditselskabi imaluunniit interessentskabi Erhverv- og Selskabstyrelsip nalunaarsuiffianiit peerneqarsinnaavoq,

- 1) sullivik nalunaarpat soqutigisaqaqatigiit tamarmik aamma komplementarit aktieselskabiujunnaartut, partnerselskabiujunnaartut (kommanditaktieselskabit), anpartselskabiujunnaartut imaluunniit selskabiujunnaartut assingusumik inatsisitigut periuseqartut,

- 2) sullivik nalunaarsorneqarsimasunik aqutsisoqarunnaarpat tamannalu iluarsineqarsinnaangippat piffissaliusseq Erhvervs- og Selskabstyrelsimit aalajangersarneqarsimasooq naatinnagu imaluunniit
- 3) aqutsisut ukiumoortumik nalunaarusiamik Erhvervs- og Selskabstyrelsimut nassiussaqaarsimangippata ukiumoortumik nalunaarusiornissamik inatsimmi Kalaallit Nunaannut kunngip peqqussutaatigut atortuulersinneqarsimasumi malittarisassat naapertorlugit.

Imm. 7. Nalunaarsuiffimmiit peerneqarnerup kingorna paasinarsippat pissutsit, piiaanermik kinguneqartitsissut, atuukkunnaarsimasut interessentskabi imaluunniit kommanditselskabi, tak. imm. 6, Erhvervs- og Selskabstyrelsimut noqqaassuteqaarsinnaavoq sullivik nalunaarsoqqinneqassasoq. Erhvervs- og Selskabstyrelsi erseqqinnerusumik maleruagassiorsinnaavoq sullivinnik imm. 6-imi taaneqartunik nalunaarsueqqittarneq pillugu.

§ 10 a. Piffissaliussat, inatsimmi matumani imaluunniit inatsit manna naapertorlugi aalajangersaasut, aallartittassapput ulloq, piffissaliisitsisumik pisoqarfiusimasooq, aallarnerfigalugu ilanngulugulu. Taamaassaaq ullunut sapaatillu akunnerinut, qaammatinut ukiunullu piffissaliussanik naatsorsuinerni.

Imm. 2. Piffissaliusseq sapaatit akunnerinut tagginneqarpat, naassaaq, tak. imm. 1, sapaatit akunnerata ulluani piffissaliisitsisumik pisoqarfiusimasumi.

Imm. 3. Piffissaliusseq qaammatinut tagginneqarpat, naassaaq, tak. imm. 1, qaammatip ulluani piffissaliisitsisumik pisoqarfiusimasumi. Ulloq taanna, piffissaliisitsisumik pisoqarfiusimasooq, qaammatip ulluisa kingullersarippassuk imaluunniit piffissaliusseq ulluliussami qaammammi ikinnerusunik ullulimmi naassappat, tamatigut qaammatup ulluisa kingullersaanni naasussaataasassaaq qaammatip qassinik ulloqarnera apeqqutaatinnagu.

Imm. 4. Piffissaliusseq ukiunut tagginneqarput, naassaaq, tak. imm. 1, ukiup ulluani piffissalliisitsisumik pisoqarfiusimasumi.

Imm. 5. Piffissaliussap naassappat sapaatit akunnerata naanerani, nalliuttumi, inatsisitaarfimmi, juulliaqqami imaluunniit ukiutoqqami, ulluinnarmut siullermut tulliuuttumut sivitsorneqartassaaq.

§ 11. Sulliviup malittarisassai imaluunniit pissutsit allat, nalunaarutiginnissutaasut, allannguuteqarpata, tamanna nalunaarutigineqassaaq, inatsimmi matumani allatut aalajangiisoqarsimangippat, taamaalilluni nalunaarut Erhvervs- og Selskabsstyrelsimi tiguneqareersimasussanngorlugi allannguutit akuersissutigineqarneranniit kingusinnerpaamik sapaatit akunnerisa arfineqmarluk qaangiunnerani. Sulliviup malittarisassaani angerlarsimaffigisap tungaatigut allannguuteqartitsisoqarpat, imaluunniit sulliviup siulersuisuini, pisortaqarfiani tamatumunngaluunniit assingusutut aqutsisoqarfiani allannguuteqartitsisoqarpat, imaluunniit kukkunersiuusumik nuutamik qinersisoqarpat, tamatuminnga nalunaarut Erhvervs- og Selskabsstyrelsimi tiguneqareersimassaaq aalajangiinerup akuersissutigineqareerneraniit kingusinnerpaamik sapaatit akunnerisa talimat qaangiunnerani.

Imm. 2. Sullivik inatsimmi pineqartunut ilaajunnaarpat, tak. § 1, imm.1, atorunnaarsinneqanngippallu, tak. § 20, tamanna imm. 1 malillugu nalunaarutigineqassaaq. Nalunaarummut ilanngullugu nassiunneqassaaq sulliviup qularutissaanngitsumik akiliisinnaassuseqarnera pillugu kukkunersiuisup naalagaaffimmit akuerisap imaluunniit nalunaarsukkap uppernarsaatitut nalunaarusiaa. Upper-narsaat taama ittoq tigueqareerpat Erhvervs- og Selskabsstyrelsiip sullivik nalunaarsuiffimmiit piis-savaa.

§ 12. Inatsit malinneqarsimanersoq isummerfiginiarlugu Erhvervs- og Selskabsstyrelsi paasissutis-sanik pisariaqartitaminik piunasaqartarsinnaavoq.

§ 13. Nalunaarsorneqarnissaq itigartitsissutaassaaq nalunaarutigineqartut inatsimmut, malittarisas-sanut imaluunniit inatsit naapertorlugu aalajangersakkanut naapertuutinngippata.

Imm. 2. Kukkuneq amigaatilluunniit pissutigalugit nalunaarutigineqartut nalunaarsorneqarsinnaan-gippata, iluarsiiisuteqarnissamut Erhvervs- og Selskabsstyrelsi piffissaliisinnaavoq. Piffissaliussa-q naatinnagu iluarsiiisoqanngippat, nalunaarsuinissaq itigartitsissutigineqassaaq.

Imm. 3. Nalunaarutiginnittoq nalunaarsuinissap itigartitsissutigineqarneranik tamatumunngalu pis-sutaasunik allakkatigut nalunaarfigineqassaaq.

§ 14. Inatsit manna malillugu nalunaarsuinerit, kattuteqatigiinnissamik nalunaarutininik tigusaqarnerit, avissaartitsinissamik pilersaarutit aamma naliliisartut §§ 21 a 21 b-lu naapertorlugit nalunaarusiaat Atuagagdliutini aammalu Erhvervs- og Selskabsstyrelsiip qarasaasiakkut paasissutis-siisarfianni erninnaq tamanut saqqummiunneqartassapput. Nalunaarsuinerit kiisalu nalunaa-rutiginnissutit ilanngussartallit, kattuteqatigiinnissamik pilersaarutit, avissaartitsinissamik pilersaa-rutit aamma naliliisartut §§ 21 a 21 b-lu naapertorlugit nalunaarusiaat kikkunnilluunniit taku-neqarsinnaatitaapput.

Imm. 2. Atuagagdliutitigut aamma Erhvervs- og Selskabsstyrelsiip qarasaasiakkut paasissutissiisar-fiatigut tamanut saqqummiunneqartut inummit allamit ilisimaneqalersutut naatsorsuunneqassapput. Taamaattorli 1.pkt.-imi aalajangersagaq atuutissanngilaq iliuutsinut, tamanut saqqum-miussereernermit ullut 16-issaat nallertinnagu iliuusaasimasunut, inuup allap uppernarsarsinnaap-pagu pissutsit tamanut saqqummiunneqartut ilisimalernissaat periarfissaqarfigisimanngikkini.

Imm. 3. Atuagagdliutitigut aamma Erhvervs- og Selskabsstyrelsiip qarasaasiakkut paasissutissiisar-fiatigut tamanut saqqummiussisoqanngikkallartillugu pissutsit, nalunaarutiginnissutaallutillu ta-manut saqqummiunneqartussat, inummut allamut atuutsinniarneqarsinnaanngillat, taassuma tamak-kuninga ilisimannereenera uppernarsarneqarsinnaanngippat. Pissutsilli taamaattut suli tamanut saqqummiunneqannginnerat inuup allap pissutsinik atuutsitsiniaanissaminut akornutigissanngilaa.

Imm. 4. Atuagagdliutitigut tamanut saqqummiussat imarisaat sullivimmut killilimmik akisussaas-susilimmut nalunaarsuutit imarisaannut naapertuutinngippata, sulliviup tamanut saqqummiussat oqaasertaat inummut allamut atuutsinniarsinnaanngilai. Akerlianilli taassuma tamanut saqqummi-

unneqartut oqaasertaat sullivimmut atuutsinniarsinnaavai, uppersarneqarsinnaanngippat pineqartup nalunaarsuutit imarisaat ilisimareersimagai.

§ 15. (Kalaallit Nunaannut atortuulersinneqassanngilaq).

§ 15 a. Pilersitsisut aqutsisullu atorfi, aqqi pillugit paasissutissat Erhvervs- og Selskabsstyrelsi qarasaasiakkut paasissutissiisarfiaq qaqugukkulluunniit takuneqarsinnaassaapput, taamaattoqasananili Erhvervs- og Selskabsstyrelsi allamik aalajangiippat. Tamanna sullivinnut sulii ingerlasunut atorunnaarsinneqarsimasunullu atuuppoq.

Imm. 2. Paasissutissanik inummut tunngasunik nutaanik imm. 1 naapertorlugu allattuisoqartarunnaassaap inuup pineqartup sullivimmi, Erhvervs- og Selskabsstyrelsi qarasaasiakkut paasissutissiisarfiaq nalunaarsorneqarsimasumi, suliuunnaarneraniit ukiut 20-t qaangiunneranni.

§ 16. Allakkat, nuutsitikkat allakkiallu allat, Erhvervs- og Selskabsstyrelsimiit tunniunneqartussat, pappialanngorlugit taamatullu qarasaasiakkoortillugit tunniunneqarsinnaapput. Allakkia inatsit naapertorlugit naligititaassapput qanoq iluseqarneri apeqqutaatinnagit. Allakkia atsiugaasinnaapput atsiugaanatilluunniit, atsiorneri maskiinamik allataasinnaapput digitalimik imaluunniit styrelsi qinigaanik taamatupajaaq allataasinnaallutik.

Imm. 2. Nalunaarutiginnissutit, naatsorsuutit allallu allakkia Erhvervs- og Selskabsstyrelsimi inatsit manna naapertorlugu tiguneqartussat, pappialanut qarasaasiamulluunniit allataasinnaapput. Allakkia inatsit naapertorlugit naligititaassapput qanoq iluseqarneri apeqqutaatinnagit. Allakkia inummit namminermit atsiugaasinnaapput, atsiorneri maskiinamik allataasinnaallutik, digitalimik imaluunniit styrelsi erseqqinnerusumik aalajangiinera malillugu taamatupajaaq allataasinnaallutik. Allakkianik eqqartorneqartunik qarasaasiatigut nassitsisarneq, matumani ilanngunneqarluni aamma nassitsinerup styrelsi aalajangigaanik iluseqartitaanissaa, pillugit styrelsi malittarisassiusaaq. Styrelsi aammattaaq qarasaasiat nassitsivissat pillugit erseqqinnerusumik piumasaqaateqarsinnaavoq.

Imm. 3. Nalunaarutiginnittarneq nalunaarsuisarnerlu il.il. pillugit maleruagassanik styrelsi aalajangersaassaaq, tamatumani aamma pissutsit suut nalunaarutiginnittunit allanilluunniit namminneq styrelsi qarasaasiakkoortitsiviani nalunaarsorneqarsinnaanerit pillugu. § 11 taamatut nalunaarsuinerit taamatulli atuutissaaq.

Imm. 4. Imm. 2 aamma 3 naapertorlugit maleruagassiat malillugit nalunaarsuineri styrelsi piffisamiit nalunaarsuiffiusumiit ukiut tallimat tikillugit nalunaarutit nalunaarsuinerulluunniit inatsisinut naapertuuttumik pineranut uppersaarneqarsimasumi nassinneqartarnissamik piumasaqaateqarsinnaavoq, tak. § 13, imm. 1.

Imm. 5. Styrelsi nalunaaruteqarnerit, nuutsiterinerit il. il., tamanut nalunaarutit, styrelsi qarasaasiakkoortitsivianik atuinermut aammalu kingusinaartumik akiliisoqarnerani eqqaasitsissutit allakkanut akiliutissat pillugit malittarisassanik aalajangersaasinnaavoq

§ 17. Isumaartoqarpat nalunaarsuisimaneq imminut ajoqusiisoq, nalunaarsuinerup piiarneqarnis-saanik apequt eqqartuussiviit aalajangiiffigisassaraat. Tamanna pillugu sullivimmut eqqartuus-sivikkut suliassiissuteqartoqassaaq nalunaarsuinerup tamanut saqqummiunneqarneraniit qaammatit arfinillit qaangiutsinnagit. Eqqartuussiviup eqqartuussutip assilineqarneranik Erhvervs- og Selskabsstyrelsi nassissavaa. Suliap qanoq inerneqarnera Atuagagdliutini aammalu nalunaarsuutini sulliviit, inatsit manna naapertorlugu nalunaarsorneqarfigisaanni, oqaaseqaatitut ilanngunneqassaaq tamanullu saqqummiussisoqassaaq, tak. § 14.

Imm. 2. Taamaattorli Erhvervs- og Selskabsstyrelsip § 12 malillugu aalajangiineri aammalu piffis-saliussanik, §§ 10-mi aamma 13-imi aalajangersarneqartunik, qaangiinerit kingunerisaattut aalajan-giinerit, § 13, imm. 2 malillugu piffissaliinerit, kiisalu §§ 20 aamma 21, imm. 1, malillugit aalajan-giinerit allaffissornikkut oqartussaasunut qulliunerusunut saqqummiunneqarsinnaanngillat.

Kapitali 5

Siulersuisuusut kukkunersiuisullu pisussaaffii

§ 18. Sullivinni inatsimmi matumani pineqartuni, sulliviit inuussutissarsiutitut ingerlatat ukiu-moortumik naatsorsuutunik il. il. saqqummiussisarnerat pillugu inatsit (ukiumoortumik naatsorsuutit pillugit inatsit) naapertorlugu ukiumoortumik nalunaarusiamik saqqummiussisussaasuni siulersui-suusut kukkunersiuisumut paasissutissiisassapput, sulliviup aamma, sullivik piginnittutut sulliviup-pat, ingerlatseqatigiissuup qanoq-issusersiornissaanut pingaaruteqarsorinartunik.

Imm. 2. Siulersuisut kukkunersiuisoq piginnaatissavaat pisariaqarsorisaanik misissuiffiginninnis-saanut, isumagissavaallu kukkunersiuisup suliassaminik ingerlatsinissaminut pisariaqarsorisaanik paasissutissillugulu ikiorsertarnissaa. Sullivimmi, ukiumoortumik naatsorsuutit pillugit inatsit naa-pertorlugu pigisatut sulliviusumi, siulersuisut sulliviup piginnittuusup kukkunersiuisuanut taamatul-li pisussaaffeqarput.

§ 19. Kukkunersiuisoq tunuassappat, imaluunniit kukkunersiuisumut suliassarititaasut naammassi-neqariartinnagit kukkunersiuisineq allatut iliornikkut unitsinneqassappat kukkunersiuisup tamanna Erhvervs- og Selskabsstyrelsimut ingerlaannaq nalunaarutigissavaa.

Kapitali 6

Atorunnaarsitsineq

§ 20. Sullivinnik killilimmik akisussaassusilinnik atorunnaarsitsinermi aktieselskabit pillugit inat-sit, Kalaallit Nunaannut kunngip peqqussutaani kapitali 14-imi atortuulersinneqarsimasoq, atuutis-saaq sulliviit immikkut ittumik pissuseqarnerat tunngavigalugu pisariaqarneratut allannguuserlugu.

§ 20 a. Sullivinni killilimmik akisussaassusilinni, akiligassaqarfisaminnut tamanut akiliisimasuni, sullivimmi peqataasut Erhvervs- og Selskabsstyrelsimut nalunaaruteqarsinnaapput akiitsut, akilerneqarfissaat qaangiunnikut qaangiunnikuunngitsullu, akilerneqarsimasut, aamma sullivik atorunnaarsimasoq. Sullivimmi peqataasut aqqi najugaqarfiilu nalunaarummi allanneqarsimassapput.

Imm. 2. Erhvervs- og Selskabsstyrelsip atorunnaarsitsineq taamaallaat nalunaarsorsinnaavaa nalunaarut styrelsimi tiguneqarsimappat atsiordermiit kingusinnerpaamik sap. akunneri tallimat qaangiunnerini. Nalunaarummut ilanngunneqassaaq sulliviup akileraarutininik akitsuutinillu akiligassaqannnginnera pillugu akileraarutininut ingerlatsivimmiit nalunaarut.

Imm. 3. Sullivimmi peqataasut akiitsunut, akilerneqarfissaat qaangiunnikunut qaangiunnikuunngitsunullu imaluunniit saqitsaassutaasunut, nalunaaruteqartoqarnerani piusimasunut namminneerlutik, nammaqatigiillutik killiligaanngitsumillu akisussaassapput.

§ 21. Erhvervs- og Selskabsstyrelsi aalajangiisinaavoq sulliviit killilimmik akisussaassuseqartut Kalaallit Nunaata Eqqartuussisuuneqarfianit atorunnaarsinneqassasut, sullivik malittarisassani peqqussutigineqartut siulersuisoqanngippat, imaluunniit styrelsi § 11, imm. 2, oqaaseqatigiit aappaat malillugit uppersaatitut nalunaarummik imaluunniit ukiumoortumik nalunaarusiamik imaluunniit ukiumoortumik naatsorsuutit pillugit inatsit malillugu pissusissamissut suliaasunik piffissaq eqqorlugu tigusaqanngippat, tamannalu styrelsip piffissaliussaa qaangiutsinnagu aaqqiivigineqanngippat. Tamannali aatsaat aalajangiiffigineqassaaq Namminersornerullutik Oqartussat oqaaseqaateqarnissamut periarfissinneqareepata.

Imm. 2. Pinngitsaaliissummik atorunnaarsitsisoqartassaaq aktieselskabit pillugit inatsimmi § 117-imi Kalaallit Nunaannut kunnguip peqqussutaatigut atortuulersinneqarsimasumi aalajangersakkat sulliviit immikkut ittumik pissuseqarnerat tunngavigalugu pisariaqarneratut naleqquttunngorsakkat malillugit.

Kapitali 6 A

Kattunneq aamma avissaarneq

Kattunneq

§ 21 a. Sullivik killilimmik akisussaaffeqartoq atorunnaarsinneqarsinnaavoq sulliviup naliliutaanik aningaasannngortitsinani sulliviup pigisaanik akiitsuinillu sullivimmut allamut killilimmik akisussaassuseqartumut, inatsimmi pineqartumut, tunniussinikkut. Taamaattoqassaartaaq sulliviit marluk arlallilluunniit killilimmik akisussaassuseqartut sullivimmut nutaamut killilimmik akisussaassuseqartumut ataatsimut kattunneqaraangata. Kattunnissamik aalajangiisoqassaaq amerlanerussuteqartumik taasinikkut, malittarisassanik allannguinnissamut pisariaqartumik.

Imm. 2. Kattunnissaq pillugu aalajangersakkat aktieselskabit pillugit inatsisip kapitali 15-ianiittut atuutissapput pisariaqartumik naleqqusarlugit.

Avissaarneq

§ 21 b. Sullivinni peqataasut amerlanerussuteqartumik, malittarisassanik allanngortitsinissamut pisariaqartumik, aalajangiisinnaapput sullivik killilimmik akisussaassuseqartoq avinneqassasoq. Avissaarnermi pigisat nalillit pisussaaffiillu tamakkiisumik tunniunneqassapput sullivinnut pioreersunut arlalinnut imaluunniit sullivinnut nutaanut killilimmik akisussaassuseqartunut inatsimmi matumani pineqartunut, taamaaliornermi sullivimmi peqataasunut aningaasaliisimasunut akiliisoqassaaq. Sullivimmi peqataasut taamatorluinnaq amerlanerussuteqarlutik avissaarnissaq pillugu aalajangiisinnaapput, taamaaliornermi sulliviup killilimmik akisussaassuseqartup pigisani nalillit pisussaaffimmilu ilaat tunniutissallugit sullivimmut ataatsimut arlalinnuunniit pioreersunut imaluunniit sullivinnut nutaanut killilimmik akisussaassuseqartunut. Tunniussinerit akiligassaqaqfigisaq akuersisinnagu ingerlanneqarsinnaapput.

Imm. 2 Avissaarnissaq pillugu aalajangersakkat aktieselskabit pillugit inatsimmi kapitali 15-imiittut atuutissapput pisariaqartumik naleqqusarlugit.

Imm. 3. Sullivimmi killilimmik akisussaassuseqartumi, avissaarnermi peqataasimasumi, akiligassaqaqfigisaq tamakkiisumik akiliivigineqanngippat sulliviit sinneri peqataasut tamarmik immikkut nammaqatigiillutik akiligassat avissaarnerup nalunaarutigineqarnerani piusut akisussaaffigissavaat, annerpaamilli sulliviup ataatsimip piffissami tamatumani ilanngaattissat ilanngaatigereerlugit nalingga ilanngunneqartoq imaluunniit sinneruttoq

Kapitali 7

Pineqaatissiissutit il.il.

§ 22. Siulersuisut, qullersaqarfik aqutsisoqarfilluunniit tamatumunnga assingisoq pisussaaffinnik, inatsit imaluunniit aalajangersakkat inatsit naapertorlugu aalajangersarneqartut naapertorlugit, Erhvervs- og Selskabsstyrelsimut naleqqiullugu pisussaaffigisaminnik, piffissaq eqqorlugu naammassinninngippata, styrelsip pineqartut taakku ullormoortunik imaluunniit sapaatit akunneranoortumik pinngitsaaliissutitut akiliisussanngortissinnaavai, pigisanik qularnaveeqqusiussisinnaatitaanertalimmik.

§ 23. Kalaallit Nunaanni pinerluttulerineri inatsit malillugu allaanerusumik pineqaatissiisoqarsimanngippat § 2, imm. 3, oqaaseqatigiit appaannik, § 6, imm. 3-mik, imm. 4, oqaaseqatigiit appaannik aamma imm. 6-8-mik, kiisalu § 8-mik, § 10, imm. 2-mik aamma §§ 11-mik 12-imillu unioqutitsinerit akiliisitsissutaassapput.

Imm. 2. Najoqqutassani, inatsit naapertorlugu suliarineqartussani, aalajangersarneqarsinnaavoq najoqqutassani peqqussutinik unioqutitsineq akiliisitsissuteqartitsinikkut pineqaatissiissutaasinnasoq.

Imm. 3. Ingerlatseqatigiiffik, anpartsselskabi, andelsselskabi, peqatigiiffik, aningaasaateqarfik imaluunniit taakku assigisaat (inatsisitigut akisussaasuusut) unioqqutitsippat, selskabi, peqatigiiffik, aningaasaateqarfik il.il. pinerluttulerinermi inatsit naapertorlugu pineqaatissinneqarsinnaavoq. Ingerlatseqatigiiffik, peqatigiiffik, aningaasaateqarfik imaluunniit taakku assigisaat (inatsisitigut akisussaasuusut) unioqqutitsippat, inatsisitigut akisussaasuusut taamatut akiliisussanngortinneqarsinnaavoq. Qallunaat naalagaaffiat, Namminersornerullutik Oqartussat, kommuni kommunilluunniit suleqatigiiffiat unioqqutitsisuuppat, naalagaaffik, namminersornerusut, kommuni kommunilluunniit suleqatigiiffiat akiliisitassanngortitaasinnaavoq, tak. kommunalbestyrelsit nunaqarfinnillu aqutsisut pillugit inatsisartut inatsisaanni § 64.

Kapitali 8

Atortuulersitsissutitut aalajangersakkat il.il.

§ 24. (Atorunnaarsinneqarpoq).

§ 25. Peqqussut atortuulerpoq ulloq 1. august 2008

Imm. 2. Peqatigisaanik atorunnaassaaq Sulliviit inuussutissarsiutitut ingerlatat pillugit inatsisip Kalaallit Nunaanni atortuulersinneqarnissaanik peqqussut nr. 1216, 7. december 2004-meersoq.

Imm. 3. (Kalaallit Nunaannut atortuulersinneqassanngilaq).

§ 26. **Imm. 1** (Kalaallit Nunaannut atortuulersinneqassanngilaq)

Imm. 2. Inatsimmi § 6, imm. 6, 1. pkt. aamma § 9 sulliviereersunut atuutinngillat.

Imm. 3 Sulliviit taaguutaat, inatsisip attortuulernerani handelsregistreni nalunaarsorneqarsimasut aamma Erhverv- og Selskabsstyrelsimut nalunaarsorneqartussatut nalunaarutigineqarsimasut, § 6, imm. 2 apeqqutaatinnagu, Erhvervs-og Selskabsstyrelsimi nalunaarsorneqarsinnaapput aamma maannamut piginnaatitaaffiit atuuttut malillugit atorneqarsinnaapput.

§ 27. (Kalaallit Nunaannut atortuulersinneqassanngilaq).

§ 28. (Kalaallit Nunaannut atortuulersinneqassanngilaq).

§ 29. (Ilanngunneqanngilaq).

¹¹ Inatsimmi nr. 246-mi 27. marts 2006-imeersumi § 8 imaqarpoq aalajangersakkanik makkuninnga:

” Imm. 1. Inatsit Savalimmiunut aamma Kalaallit Nunaannut atuutinngilaq.

Imm.2. Taamaattoq inatsimmi §§ 1-4- aamma 6 Kunnqip peqqussutaatigut tamakkiisumik imaluunniit ilaannakuusumik nunanut taakkununga atortuulersinneqarsinnaapput, savalimmiuni imaluunniit kalaallit nunaanni pissutsit immikut ittut atuuttut naapertorlugit allannguuserlugit.”

Tunniunneqarpoq Christiansborg Slot-imi, ulloq 23. juni 2008

Kunngiussutsitsinnik Atsiorpugut Naqissusiillutalu

MARGRETHE R.

/Bendt Bendtsen